



LEMBAGA PEMASARAN PERTANIAN PERSEKUTUAN (FAMA)
BANGUNAN FAMA POINT, LOT 17304, JALAN PERSIARAN SATU,
BANDAR BARU SELAYANG, 68100 BATU CAVES, SELANGOR DARUL EHSAN.
Tel: +603-60332020 Email : fama@fama.gov.my

SIARAN MEDIA

FAMA DAN CROP POWER PERKENAL MALAYSIA FARMING AWARD, PLATFORM PENGIKTIRAFAN BAHARU UNTUK HARGAI KECEMERLANGAN PETANI NEGARA

SELAYANG, 6 Julai 2026 – Lembaga Pemasaran Pertanian Persekutuan (FAMA) bersama Crop Power memperkukuh usaha memperkasakan sektor pertanian negara menerusi pengenalan Malaysia Farming Award (MFA), sebuah platform pengiktirafan baharu yang diwujudkan bagi menghargai pencapaian, komitmen dan kecemerlangan petani tempatan dalam menghasilkan tanaman berkualiti tinggi.

Inisiatif ini merupakan penambahbaikan daripada program terdahulu yang dikenali sebagai My Best Harvest Competition, yang telah berjaya dilaksanakan selama enam musim berturut-turut sejak tahun 2023. Program berkenaan telah merekodkan penyertaan seramai 246 petani dan diperkenalkan bagi mengiktiraf petani yang berjaya mencapai hasil tuaian terbaik, mengamalkan pengurusan ladang yang baik serta berkongsi pengalaman positif dalam meningkatkan produktiviti tanaman.

Susulan kejayaan tersebut, program ini dinaik taraf kepada Malaysia Farming Award sebagai satu platform pengiktirafan yang lebih besar, mampan dan berimpak tinggi melalui kerjasama strategik antara Crop Power dan FAMA. Inisiatif ini mencerminkan komitmen kedua-dua pihak dalam memperkukuhkan ekosistem pertanian negara dengan mengetengahkan amalan pertanian terbaik serta kisah kejayaan petani tempatan.

Malaysia Farming Award memberi tumpuan kepada pengiktirafan petani yang menunjukkan kecemerlangan dari aspek prestasi tuaian, pengurusan ladang, inovasi, penggunaan teknologi pertanian serta kesungguhan menghasilkan produk pertanian yang berkualiti. Pada masa sama, program ini menjadi pemangkin kepada komuniti petani untuk terus mempertingkatkan keupayaan, menerapkan amalan terbaik dan meningkatkan standard pengeluaran tanaman secara berterusan.

Bagi memastikan pemilihan penerima dibuat secara telus dan berasaskan merit, proses pemilihan Malaysia Farming Award akan dilaksanakan melalui beberapa peringkat utama. Peserta perlu mengemukakan penyertaan lengkap yang merangkumi maklumat ladang, gambar perkembangan tanaman, rekod pengurusan, pencapaian hasil tuaian serta pengalaman berkaitan penggunaan input pertanian. Semua penyertaan yang diterima akan melalui proses semakan dan pengesahan bagi memastikan maklumat yang dikemukakan adalah tepat serta memenuhi syarat

penyertaan.

Seterusnya, penyertaan akan dinilai berdasarkan kriteria yang telah ditetapkan meliputi kualiti dokumentasi hasil tanaman, pencapaian tuaian, amalan pengurusan ladang, keberkesanan penggunaan produk, kreativiti perkongsian pengalaman serta tahap keseluruhan pengurusan pertanian peserta. Penilaian turut mengambil kira penglibatan komuniti melalui jumlah tanda suka pada hantaran asal dan tempoh pengundian, selain penilaian profesional oleh jawatankuasa yang terdiri daripada wakil Crop Power dan FAMA.

Melalui mekanisme penilaian tersebut, seramai tujuh peserta terbaik akan dipilih sebagai penerima Malaysia Farming Award berdasarkan pencapaian keseluruhan. Pendekatan ini bukan sahaja memberi penghargaan kepada petani berprestasi tinggi, malah menyediakan satu pangkalan data petani yang lebih tersusun bagi menyokong perancangan program pembangunan pertanian pada masa akan datang.

Penyampaian hadiah dan pengiktirafan kepada pemenang Malaysia Farming Award akan disempurnakan bersempena Pameran Pertanian, Hortikultur dan Agropelancongan Malaysia (MAHA) 2026 yang berlangsung di Kluster Kingdom of Agrofood, Malaysia Agro Exposition Park Serdang (MAEPS), Serdang. Acara ini dijangka menjadi platform penting untuk mengetengahkan kejayaan petani tempatan serta mempertemukan pemain industri, usahawan tani dan masyarakat umum dalam meraikan kemajuan sektor agromakanan negara.

FAMA yakin pelaksanaan Malaysia Farming Award mampu menjadi inspirasi kepada lebih ramai petani untuk mencapai tahap pengeluaran yang lebih tinggi, mengamalkan pengurusan ladang secara profesional serta menjadikan pertanian sebagai sektor yang moden, berdaya saing dan mempunyai nilai ekonomi yang kukuh.

Kerjasama strategik antara FAMA dan Crop Power ini juga selari dengan usaha memperkukuhkan rantai nilai agromakanan negara melalui pendekatan kolaborasi kerajaan dan industri, sekali gus membantu memperkasakan komuniti petani serta menyokong agenda keterjaminan makanan negara.

####

Disediakan oleh:

**Cawangan Korporat & Advokasi FAMA
Kementerian Pertanian dan Keterjaminan Makanan
6 Julai 2026**

